

Wanita Islam dengan Soal Poligami

Setelah beberapa lama menghilangkan diri, maka kini Ummu Muhsin penulis ruangan Alam Wanita yang sering menggariskan penanya di halaman majalah Qalam telah muncul kembali menulis dan membayangkan soal poligami atau berbilang isteri memang selalu mendapat tentangan yang hebat dari ahli fikir Barat juga mendapat tentangan dari golongan intelek Islam yang berpendidikan Barat.

Di dalam tulisannya kali ini Ummu Muhsin tidak akan mengulas soal poligami secara menjawab tentangan-tentangan yang dibuat oleh ahli fikir Barat itu tetapi beliau hanya membayangkan bagaimana Rasulullah *ṣallā Allāhu ‘alayhi wa sallam* seorang manusia yang mempunyai isteri yang banyak itu dapat mententeramkan keadaan suasana rumahtangganya yang mulia itu. – Pengarang.

Oleh: Ummu Muhsin

Alam Wanita

Muhammad sebagai seorang suami dan rasul:

Kalau kita hendak memperkatakan sesuatu perihal “isteri-isteri nabi” yang hidup di dalam sebuah rumahtangga yang sentiasa diseliputi oleh suasana aman dan damai, maka itu tak dapat tiada kita hendaklah terlebih dahulu membuat suatu penjelasan sambil meninjau peribadi orang yang menjadi penghulu atau ketua rumahtangga itu sendiri, yaitu tuan punya rumah yang telah memperlindungi kehidupan mereka sehari-hari. Beliau itu tidak lain daripada Junjungan kita Nabi Muhammad *ṣallā Allāhu ‘alayhi wa sallam*.

Untuk tinjauan yang ringkas ini, tidaklah perlu rasanya disajikan riwayat hidup Junjungan kita yang mulia itu dengan sepenuhnya, tetapi memadahkan dengan hanya menerangkan kedudukan baginda sebagai seorang suami dan sebagai seorang manusia utama yang telah berjaya memperlindungi *ummahāt al-mu’minīn* di dalam kedudukan rumahtangga mereka sebagai isteri, sehingga mereka dipandang sebagai

isteri-isteri yang bersifat mulia oleh seluruh masyarakat Arab di zaman itu, dan di akhirat pula mereka telah mendapat jaminan yang sepenuhnya dari Tuhan menjadi penghuni mahligai-mahligai indah di taman syurga.

Untuk memperbezakan di antara peribadi Muhammad sebagai seorang lelaki yang menjadi suami dengan seorang nabi yang menjadi rasul, amatlah sukarnya. Hal ini tidak pula begitu caranya dengan kehidupan seorang nabi yang lain seperti Nabi Musa dan Isa *‘alayhimā al-salām*, kerana jawatan nabi dan rasul yang disandang oleh Muhammad *ṣallā Allāhu ‘alayhi wa sallam* masih ada perhubungannya dengan cara hidup masyarakat yang terdahulu daripadanya dan tidak memutuskan di antara baginda dengan sifat mulianya sebagaimana seorang “lelaki” yang berjiwa tenang, sabar dan tenteram di sisi isteri-isterinya yang heboh dengan keluarga dan anak-pinak, yang

sibuk dengan tanggungjawab sebagai seorang rasul pilihan. Walaubagaimana tinggi taraf kemuliaan yang telah dianugerahkan Tuhan kepadanya, ia tetap bersifat seperti manusia biasa, berjalan di pasar, mencuci pakaian, menjahit bajunya yang koyak dan menampal kasutnya yang berlubang dengan tenaganya sendiri, ia tetap selamanya merendahkan diri, tidak sombong dan tidak bermegah-megah dengan segala kebesaran yang telah dicapainya. Suka menolong orang-orang yang dalam kesusahan, murah hati dan mempunyai perasaan belas kasihan. Tegasnya keseluruhan hidup beliau sehari-hari sentiasa mendatangkan manfaat yang besar terhadap masyarakat yang berada di sekelilingnya.

Demikian pula jawatan “Rasul Allah” yang telah dikurniakan Tuhan kepadanya itu tidak pernah mencabut perasaan peri kemanusiaan yang tertanam di dalam jiwanya dari sejak semula jadi, tetapi jawatan yang mulia

Alam Wanita...

itu menjadikan ia seorang manusia yang rendah hati, khusyuk dan tawaduk menghadapi cabaran masyarakat kaum Quraisy yang menaruh hasad dengki terhadapnya.

Walau bagaimanapun sifat-sifat yang ada pada manusia biasa masih tetap dimilikinya, perasaan-perasaan kasih, benci, takut, berani, rindu dan keinginan semulajadi yang dirasakan oleh anak-anak Adam yang lain masih tidak dapat dihindarkan daripada jiwa batinnya. Tradisi-tradisi yang selalu menimpai anak Adam tak dapat dielakkan. Beliau pernah bersuka dan berduka, pernah sihat dan sakit, pernah hidup dan mati, kerana asal keturunan beliau adalah daripada manusia biasa, beribu, berbapa, beranak bercucu dan berkeluarga. Ini telah ditegaskan oleh Tuhan di dalam sepotong ayat suci yang maksudnya:

“Muhammad itu tidak lain melainkan seorang rasul, yang telah lalu dahulu daripadanya beberapa orang rasul, apakah jika ia mati atau terbunuh, kamu akan berpaling tadah? Pada hal barangsiapa yang berpaling tadah, maka ia tidak akan menyusahkan Allah sedikit jua pun, dan Allah akan membalas (memberi ganjaran pahala) kepada orang-orang yang bersyukur.”
(*Āli ‘Imrān*: 144).

Tanda-tanda yang menunjukkan bahawa Nabi Muhammad itu sebagai manusia biasa seperti kita juga sudah jelas diterangkan di dalam ayat di atas. Oleh itu Allah *‘Azza wa Jalla* memberikan segala apa

juga emosi dan perasaan yang pernah diberikan-Nya kepada seumum manusia. Ia pernah diberikan perasaan sedih sewaktu kehilangan anak, paman dan isteri yang sangat dicintainya. Ia pernah dihujani dengan berbagai-bagai fitnah oleh musuh-musuhnya. Ia pernah mengalami kekalahan di dalam peperangan menegakkan kebenaran, ia pernah mendapat luka-luka di medan pertempuran, yang mana semuanya ini menimbulkan perasaan sedih dan dukacita baginya. Di samping itu ia selalu pula diberikan perasaan sukacita terutama di atas kejayaannya menegakkan agama Allah di muka bumi ini dalam masa 23 tahun sahaja. Semuanya ini dengan kehendak Allah yang telah tersurat bagi rasul-Nya:

“Katakanlah wahai Muhammad! Aku tidak memiliki bagi diriku, kebajikan atau kejahatan melainkan apa yang dikehendaki Allah. Kalaupun aku bersedia mengetahui akan perkara-perkara yang ghaib, tentulah aku memperbanyakkan perkara-perkara yang baik dan tidaklah aku akan ditimpa sesuatu yang membahayakan. Aku hanyalah seorang manusia yang membawa peringatan . . . (Maksud ayat suci al-Qur’ān).

Alangkah besarnya kemuliaan yang telah dikurniakan Tuhan kepada makhluk yang berjenis manusia. Daripada keturunan merekalah diangkat beberapa orang nabi dan rasul untuk membawa agama Allah yang diturunkan dari langit. Dan sebelum itu pula, Allah *‘Azza wa Jalla* telah memuliakan manusia dengan memerintahkan malaikat supaya sujud (menghormati) Adam sebagai bapa manusia seluruhnya.

Walau bagaimanapun sifat-sifat ketinggian dan kemuliaan yang telah

dikurniakan Allah kepada Nabi Muhammad tidaklah dapat ditandingi oleh manusia yang lain. Oleh itu beliau seorang sahajalah yang dipilih menjadi penghulu sekalian nabi-nabi dan rasul-rasul. Beliau seorang sahajalah yang ditugaskan membawa agama Islam sebagai penamat segala agama-agama yang diturunkan Tuhan ke alam dunia ini.

Kembali kita memperkatakan tentang peribadi Muhammad sebagai seorang suami dan sebagai seorang rasul. Sebagai seorang suami ia harus menyelenggarakan soal rumahtangga dengan secara adil dan saksama, ia mesti menghadapi isteri-isteri yang memiliki sifat-sifat keras dan cemburu, mereka juga terdiri daripada manusia biasa yang sudah pasti memiliki sifat-sifat tersebut. Sedang rasul sendiri sebagaimana yang telah saya katakan tadi mempunyai emosi dan perasaan seperti biasa. Perasaan kasih dan benci, perasaan suka dan duka, tak boleh dipisahkan daripada jiwanya. Sebagai seorang rasul pula ia harus memikul tanggungjawab yang besar sekali bagi menyebarkan ajaran-ajaran Tuhan di kalangan kaum bangsanya yang bersifat degil dan berhati batu itu. Kedua-dua tanggungjawab ini harus dipikulnya di dalam suatu masa dengan hati yang cekat dan tabah. Walau bagaimanapun berat tugas yang dipikulnya, namun ia tak pernah mengeluh, malah dapat dijalankan dengan cara yang teratur. Ini tidak hairan, kerana di samping tenaga dan usahanya beliau mendapat bimbingan, diberi pimpinan oleh suatu kuasa ghaib. Beliau sentiasa menerima arahan dari Tuhan sebelum melakukan

Alam Wanita...

sebarang tindakannya terhadap rumahtangga dan masyarakat yang di bawah pimpinannya. Kalau arahan yang diterimanya itu memerintahkan ia mesti bersikap tegas, maka dengan tidak ragu-ragu lagi ia mesti bertindak dengan sikap kekerasan, kalau arahan itu berkehendak ia mesti bersabar, maka akan mengambil jalan yang kedua yaitu bertenang dan lembut. Oleh itu nyata kelihatan dalam tindak-tanduk perjuangannya, kadang-kadang ia bersikap tegas dan keras dan di suatu masa yang lain ia terpaksa mengalah dan bersabar.

Di lapangan rumahtangga beliau tidak dikehendaki bersikap terburu nafsu menghadapi sesuatu kejadian yang tidak diinginkannya. Misalnya dalam perkara “*al-iftk*” (fitnah atau tuduhan buruk yang dilemparkan oleh kaum munafik kepada Saiyidatina Aisyah *raḍīya Allahu ‘anhā*). Nabi sendiri tidak bertindak secara melulu untuk menyelesaikan perkara tersebut, melainkan setelah turun wahyu dari Tuhan yang menyatakan kebersihan Saiyidatina Aisyah daripada fitnah yang bertujuan untuk mencemarkan nama *Ummu al-mu’minīn* itu dipandang mata masyarakat umum.

Demikian juga tentang perkahwinan baginda dengan Siti Zainab binti Jahsh – bekas isteri anak angkat beliau Zaid bin Harithah – tidak dapat beliau terima sebelum daripada turunnya perintah yang tegas daripada Allah yang menegur supaya Junjungan kita itu jangan menyembunyikan di dalam hatinya sesuatu perkara yang akan dizahirkan oleh Allah, dan mengapa ia harus

takut kepada kata-kata sindiran daripada manusia sedang Allah telah mengharuskan perkahwinan itu dilangsungkan?

Selain daripada itu perbuatan Rasulullah Allah mengharamkan Mariah al-Qibtiyyah – Jariyyah dari Mesir – bagi dirinya pada hal Mariah telah dihalalkan Allah baginya. Perbuatan Nabi ini telah mendapat teguran keras daripada Allah dengan mengutuskan Jibril bertanya kepada beliau: “Mengapa ia mengharamkan perkara yang telah dihalalkan baginya, kerana hendak mencari keredhaan isteri-isterinya yang lain?”

Demikian pula tentang perbuatan isteri-isteri Nabi yang menunjukkan rasa tidak puas hati terhadap cara hidup mereka yang serba-serbi dalam keadaan sempit itu, tidaklah dapat diselesaikan oleh beliau sendiri melainkan setelah turunnya firman Allah di dalam *sūrah al-Aḥzāb* yang maksudnya:

“Wahai Nabi! Katakanlah kepada isteri-isterimu: Kalau kamu berkehendak (mencintai) kehidupan dunia dan perhiasannya, maka marilah kamu supaya aku beri kesenangan (dunia) kepada kamu, dan melepaskan kamu dengan cara yang sebaik-baiknya. Kalau pula kamu berkehendak (mencintai) Allah dan rasul-Nya serta negeri Akhirat, maka sesungguhnya Allah telah menyediakan bagi orang-orang yang mengerjakan kebaikan dari antara kamu ganjaran pahala yang besar.” (*Sūrah al-Aḥzāb* ayat 28, 29).

Begitulah keadaannya, perjalanan hidup isteri-isteri Nabi itu adalah sentiasa terletak di bawah pengawasan

dan perlindungan Allah ‘*Azza wa Jalla*, yaitu berlainan daripada yang biasa dialami oleh perempuan-perempuan biasa, kehidupan mereka terserah di atas kebijaksanaan mereka menggunakan akal fikiran yang telah dikurniakan Tuhan, mereka sendirilah yang disuruh memilih di antara kehidupan yang baik dengan kehidupan yang jahat. Berhubung dengan ini Allah ada berfirman lagi di dalam al-Qur’ān yang ditujukan khas kepada isteri-isteri Nabi yang maksudnya:

“Wahai isteri-isteri Nabi!

Kamu bukanlah seperti perempuan-perempuan yang lain jika kamu bertakwa kepada Allah, oleh itu janganlah kamu berkata-kata terlalu lemah-lembut sehingga orang lelaki yang hatinya berpenyakit (berniat serong) boleh jatuh cinta kepada kamu, dan katakanlah perkataan yang baik (yang tidak melanggar kesopanan), dan tinggal tetaplah kamu di rumah kamu, dan janganlah melagak dan mendedahkan diri sebagaimana sikap kaum jahiliah di zaman dahulu, dan kerjakanlah sembahyang dan keluarkanlah zakat serta taatlah kamu kepada Allah dan rasul-Nya. Hanya sanya Allah menghendaki supaya menghapuskan kekotoran (dosa) daripada kamu wahai ahli rumah Nabi, dan supaya membersihkan kamu dengan sebersih-bersihnya, dan ingatlah kamu akan apa yang dibacakan di dalam rumah kamu daripada ayat-ayat suci Allah dan ilmu pengetahuan, sesungguhnya Allah Amat Lemah-lembut (Mengasihani) lagi Amat Mengetahui.”

Alam Wanita...

Daripada segala apa yang telah dibentangkan di atas, rasanya cukuplah bagi menunjukkan bagaimana sukarnya hendak memperbezakan di antara peribadi Nabi Muhammad *ṣallā Allāhu ‘alayhi wa sallam* sebagai seorang suami (yang merupakan manusia biasa) dengan peribadinya sebagai seorang nabi dan rasul pilihan Tuhan.

Suasana rumahtangga yang aman tenteram:

Suami manakah yang dapat menghimpunkan beberapa orang isteri yang berlainan kabilah, berlainan usul-asal¹ keturunan, berlainan warna kulit, berasingan tempat dilahirkan, berselisihan tingkat umur dan bentuk rupa di dalam sebuah rumahtangga yang aman tenteram? Hanya seorang manusia yang bersifat mulia, adil dan bijaksana sahajalah yang dapat melakukan hal yang demikian itu. Manusia yang saya maksudkan itu tidak lain daripada Junjungan kita Nabi Muhammad *ṣallā Allāhu ‘alayhi wa sallam*.

Harus kita akan dapat mengetahui sedikit sebanyak setelah kita mengadakan penyelidikan tentang perbezaan peribadi Muhammad sebagai seorang suami dan sebagai seorang rasul pada waktu anak muda keturunan Banī Hasyim itu pergi bersama-sama kedua ayah saudaranya Abu Talib dan Hamzah ke rumah Siti Khadijah bin Khuwailid – seorang janda kaya keturunan bangsawan Quraisy – dan kemudian, hari perkahwinannya dengan perempuan janda yang hartawan itu dalam tahun yang kelima

belas sebelum ia diutus oleh Allah menjadi rasul. Pada masa itu ia hanya sebagai manusia biasa, seorang pemuda Quraisy yang muda remaja, umurnya baharu meningkat kedua puluh lima tahun, manusia biasa yang saya maksudkan ialah pada masa itu ia hanya sebagai suami kepada Siti Khadijah yang telah berumur empat puluh tahun – tetapi menurut sejarah masih kelihatan muda dan segar – pada ketika itu belum kedapatan unsur-unsur keanehan di dalam peribadi Muhammad yang boleh memperbezakannya dengan manusia biasa, selain daripada tabiat semulajadinya yang suka mengasingkan diri daripada masyarakat jahiliah yang penuh dengan serba aneka maksiat dan kekufuran.

Dari segi akhlak nyata kelihatan ia mempunyai sifat-sifat yang tinggi mulia, mempunyai akal fikiran yang luas, tidak mudah dipengaruhi oleh pangkat kebesaran, harta benda dan kemewahan hidup. Ia seorang pemuda yang selalu bertenang dan banyak memikirkan sesuatu kejadian Tuhan yang di sekelilingnya.

(Bersambung)

Harga langganan majalah Qalam

6 bulan	\$3.60
1 tahun	\$7.20
Senaskhah	\$0.60

Termasuk belanja *post*.

Pesanlah kepada

Penerbitan Qalam

8247, Jalan 225,
Petaling Jaya,
Selangor.

Sambungan dari muka (23) yang berasal daripada keturunan yang satu itu, dan di mana terletaknya ranjau-ranjau yang menghalangi keamanan dunia yang patut dikaji dan dianalisa dengan sehalus-halusnya sebelum ia dapat dicabut dan dibasmi sampai ke akar umbinya sekali.

Di akhirnya sekali lagi kami mengemukakan harapan yang sepenuhnya kepada tuan agar sudilah kiranya tuan melaporkan kepada kami, jika di sana tuan dapati suatu sikap kasar dan biadab yang dilakukan oleh umat Islam yang membawa kepada terbantutnya usaha-usaha bagi mewujudkan perdamaian dan keamanan dunia.

Saya berjanji akan mencurahkan segenap tenaga dan terus berusaha dengan sedaya upaya bagi mencabut ranjau-ranjau yang menjadi batu penghalang untuk menuju ke arah cita-cita mewujudkan sebuah dunia yang aman damai, seterusnya saya bersedia pula menyeru dan memperingatkan pemimpin-pemimpin penganjur-penganjur dan ketua-ketua negara Islam dalam soal ini, dengan syarat jika benar-benar ranjau-ranjau dan batu-batu penghalang itu datangnya daripada dunia Islam. Sekian, *wa al-salām ‘alā man atba’ al-hudā*.

Saduran dari:

(Majalah *Rābiṭah al-‘Ālam al-Islāmī*)

Kata-kata hikmah

Kalau seseorang yang bijak selalu melakukan kekeliruan, nescaya akan terdapat banyak orang yang bodoh yang mengulangi kekeliruan itu.

(XXXX)

¹ Perkataan sebenarnya adalah asal-usul.